

17 May 2025

समे & 12:25 hrs.

Govt-Delegation

केंद्र सरकार आपरेशन सिंदूर दे मद्देनजर पाकिस्तान प्रायोजित आतंकवाद दे खिलाफ भारत दा पक्ख रखने आस्तै बक्ख-बक्ख देशें च बहुदलीय शिष्टमंडल भेजने दा विचार करा'रदी ऐ। सूत्रें मूजब हरेक शिष्टमंडल च सत्ताधारी ते विपक्षी पार्टियों दे सांसद शामिल होडन। कांग्रेस दे वरिष्ठ नेता जयराम रमेश होरें नमीं दिल्ली च संवाददाताएं गी दस्सेआ जे संसदीय कार्य मंत्री किरें रिजिजू होरें कांग्रेस अध्यक्ष मल्लिकार्जुन खड्गे हुंदे नै इस कूटनीतिक पहल पर गल्लबात कीती ऐ। सरकार दी इस पैहल दा मकसद पाकिस्तान च फल्ला-फुल्ला दे आतंकवाद पर भारत दी स्थिति कन्नै कुल संसारी समुदाय गी अवगत कराना ऐ ते पाकिस्तान किस चाल्ली आतंकवाद गी शैह ते समर्थन देइयै इसी अपनी सरकारी नीति दे तौरा पर इस्तेमाल करै करदा ऐ, इस बारै ओहदा अस्सल चेहरा दुनिया दे सामने आहनना ऐ। इनें प्रतिनिधिमंडलें च बक्ख-बक्ख राजनीतिक दलें दे सांसद, मन्ने परमन्ने दियां राजनीतिक हस्तियां ते मानजोग राजनयिक शामिल न, इनें 7 प्रतिनिधिमंडलें दा नेतृत्व करडन। कांग्रेस सांसद शशि थरूर, बीजेपी सांसद रविशंकर प्रसाद, जनता दल यूनाइटेड सांसद संजय कुमार झा, बीजेपी सांसद बैजयंती पंडा, डीएमके सांसद कनिमोझी करुणानिधि, राष्ट्रवादी कांग्रेस पार्टी सांसद सुप्रिया सुले ते शिवसेना सांसद श्रीकांत एकनाथ शिंदे, संसदीय कार्य मंत्री किरें रिजिजू होरें 7 दलीय प्रतिनिधिमंडलें दे महत्व उप्पर लोह पांदे होई आखेआ जे एह प्रतिनिधिमंडल भारत दे सांझे संदेश गी लेइयै चलडन जेदे च आतंकवाद गी दना बी बर्दाश्त नैई करने आहली नीति दा संदेश होग। उनें आखेआ जे एह सियासी मतभेद सोआं परे राष्ट्री एकता दा इक शक्तिशाली प्रतीक ऐ। उनें आखेआ जे ऐसे मौके पर जिसले सब्बनें शा मता जरूरी हुंदा ऐ। भारत इक्कजुट होइयै किट्टे खडोंदा ऐ।

<><><><><><>

Army Commander Visit

फौज दी उत्तरी कमान दे अध्यक्ष लेफ्टिनेंट जनरल प्रतीक शर्मा होरें कल राजौरी ते पुंछ जिले दे बन्ने कन्ने लगदे अगेत्रें इलाकें दा दौरा करियै उत्थे मजूदा सुरक्षा हालात दा जायजा लैता ते फौज दिएं कारवाइएं सरबन्धी तैयारिएं दी समीक्षा कीती। दौरे दौरान उनें गल्लबात कीती ते हालिया कारवाइएं च उंदे समर्पण भाव ते कामयाबी लेई उंदी मती सराहना बी कीती। लेफ्टिनेंट जनरल शर्मा होरें फौज दे सब्बनें अधिकारिएं ते जवानें गी आखेआ जे ओह अगगे बी पूरी चाल्ली सौहगे, सतर्क रेइयै अपनी ड्यूटी अंजाम देन ते ठीक इस्सै चाल्ली अपनी पेशेवराना महारत दा मजायरा करदे रौहन। उनें मुलखे दी रक्षा ते नागरिकें दी हिफाजत लेई फौज दिएं कारवाइएं सरबन्धी तैयारिएं दे महत्व पर लो पांदे होई खित्ते च रमानदारी ते स्थिरता बनाई रखने च थेआरबंद बलें दी दलेरी ते निष्ठा दी सिफ्त कीती।

<><><><><><>

DGP-Border Visit

जम्मू-कश्मीर दे पुलस महानिदेशक नलिन प्रभात होरें जम्मू जिले दे बन्ने कन्नै लगदे इलाकें दा दौरा लाया ते उत्थे मजूदा सुरक्षा हालात दा जायजा लैता। दौरे दौरान उनें उत्थे तैनात बलें कन्नै गल्लबात बी कीती। पुलसै दे होर बी सीनियर अफसर दौरे दौरान उन्दे कन्नै हे जिनें आर.एस.पुरा, काना चक्क ते अंतरराष्ट्री बन्ने कन्नै लगदे होरनें इलाकें दा बी दौरा कीता। उनें भारत ते पाकिस्तान बश्कार बनी दी तनोतनी आहली हालिया स्थिति दे दौरान जम्मू-कश्मीर पुलस दी तुरत कार्रवाई, टकोहदा करियै म्हौल खराब होने दी शेंका गी सेई करदे गै बन्ने कन्नै लगदे रिहायशी इलाके खाली कराइयै लोकें गी सुरक्षित थाहरें पजाने आहली कार्रवाई दी सराहना कीती।

Dar-Schemes

ग्रामीण विकास ते पंचैती राज मंत्री जावेद अहमद डार होरें सिविल सचिवालय श्रीनगर च इक्क समीक्षा बैठक दौरान ग्रामीण सशक्तिकरण आस्तै सरकार दी बचनबद्धता गी फी पक्का कीता। उनें अधिकारियें गी पी.एम ग्रामीण आवास योजना, पी.एम.ए.वाई-जी, मनरेगा ते होरनें कई योजनाएं गी पारदर्शी तरीके कन्नै लागू करने दा आग्रह कीता। उनें अधिकारियें गी विधायकें दे कन्नै सहयोग कन्नै कम्म करने ते चला'रदी परियोजनाएं च तेजी आहनने दा हुकम दित्ता। बैठक च दस्सेआ गेआ जे माली बरे 2024-25 च पी.एम.ए.वाई-जी दे तैहत रिकार्ड 1 लक्ख 12 ज्हार मकान पूरे कीते गे जेड़ा जम्मू-कश्मीर च हुनै तगर दा सब्भनें शा मता बड्डा आंकड़ा ऐ। एहदे अलावा मनरेगा तैहत 4 करोड़ 7 लक्ख 4 ज्हार ध्याड़ियें आहला रोजगार पैदा कीता गेआ ते 1 लक्ख 84 ज्हार कम्म पूरे कीते गे जेड़े रोजगार ते ग्राई बुनियादी ढांचे च महत्वपूर्ण उपलब्धियें गी दर्शादे ना। मंत्री होरें जवाबदेही ते समेंसिर सेवा प्रदान करने दे महत्व पर जोर दित्ता।

<><><><><><>

Doda-RDD

डोडा दे जिला विकास कमिशनर हरविंद्र सिंह होरें कल इक जायजा बैठक सदियै जिले च ग्रामीण विकास क्षेत्र च होए दे कम्मों दी समीक्षा कीती ते कन्नै 2025-26 आहले माली बरे गितै योजनाएं, उन्दे पर चलै रदे कम्मों ते प्रगति दा बी जायजा लैता। बैठका च सरबन्धित मैहकमें दे प्रमुख अधिकारी बी मजूद हे जिस दौरान महात्मा गांधी राश्ट्री ग्रामीण रोजगार गरंटी कनून मनरेगा, प्रधानमंत्री ग्रामीण आवास योजना ते स्वच्छ भारत मिशन ग्रामीण तैहत जारी कम्मों दी प्रगति ते रफ्तार दा जायजा लैने दे कन्नोकन्नी भविष्य दिएं योजनाएं पर बी विचार बटांदरा कीता गेआ।

<><><><><><>